



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 3

László Krasznahorkai nem Nobel Prize in Literature agütsür

Kishor-i aniba Jan Suraaj party-i candidates 51 tenüng sangdongogo



VOL. XXIII ISSUE NO. 03 (ADOK 03) DIMAPUR ROGONÜ (FRIDAY) MONGPUTENI (OCTOBER) 10, 2025

₹ 5.00

Tsiedukhru stretch atema tetuyuba agütsür

Dimapur, October 9, 2025

(TYO): NH-29 (Dimapur-Kohima road) nung Tsiedukhru (Pagala Pahar) lenmang nung multi-axle vehicles (MAVs) atema Commissioner of Police Dimapur-i tenokdangba kar agütsüogo.

Tawa tu road safety aser geotechnical experts ajanga reprangdangba sülen tenokdangbatem agütsüogo.

Anepdang 10:00 ako nungi nikongdang 5:00 ako tashi mapang lemsar MAVs senzüdaktsütsü. Traffic police-i ashiba ama MAVs senzütsü aser Tsiedukhru stretch nung 20 km/h tema manitsüla ta Commissioner of Police Dimapur Aotula T Imchen-i metetdaktsüogo.

Tsiedukhru stretch nung garitem tsüngda tepila ayutsüla aser khu talila abenba garitembo mesenzüdaktsütsü ta laisa ashi.

NHIDCL aser transport department-i traffic police den yaritepa khu talila abenba garitem jangjatsü aser mesenzüdaktsütsü ta CP Dimapur-isa ashi.

Tsiedukhru stretch nung 30 tonnes gross vehicle weight tema abenba MAV mesenzüdaktsütsü ta laisa shisem.

Timtem ajuruba tesemtem nung NHIDCL-i operators aser support staff ayutsü. Gari raksaba mesüra anentsüh ajanga highway noktangtsüsa tensa ajurura parnoki yariteptsü ta Commissioner of Police-isa metetdaktsüogo.

NH-29 kübok Tsiedukhru stretch süidang driver ajaki anentsüh mesüra lung tsükba nungi kümdanga senzütsü metetdaktsür. Talisa MAV operators-i lendong nungi jenbua alitsü atema ketdangsürtemi ashiba angatsü metetdaktsür ta CP Dimapur-isa ashi.

Sethrongkyu-i State IT Ministers' Round Table nung shilem agi

Dimapur, October 9, 2025

(TYO): Information Technology & Communication, Economics & Statistics and Evaluation, GoN, Advisor H. Sethrongkyu Sangtam-i State IT Ministers' Round Table nung shilem agiogo.

October 8, 2025 nü Yashobhoomi, New Delhi nung India Mobile Congress (IMC) 2025 alidang Advisor Sethrongkyu-i iba sentong nung shilem agia liasü.

Senden nung Union Minister for Communications, Government of India, Jyotiraditya M. Scindia menden liasü aser pai state tem dang equal partners ama inyaktsü nüngdakba ashi.

State temi mapa tajungtem

inyaktsüla, last-mile connectivity merangtsüla, RoW maparen tezübaba kümdaktsütsüla aser innovative models ajungkettsüla ta Union Minister Jyotiraditya-isa ashi.

Iba senden ya "Innovate to Transform" omen nung ajemdaker agi aser Viksit Bharat 2047 alizüng den külemi telecom, industry, infrastructure, society, aser sustainability nung temelenshi tulu adoktsü atema tebilembatem lemsatep.

Nagaland sorkari Department of Telecommunications, GoI aser telecom service providers den yaritepa telecom infrastructure aser services tajungba kümdaktsütsü atema inyaker.

Chungtia kaketshirtemi anogo 5 züngzüksür

Dimapur, October 9, 2025

(TYO): Mokokchung District kübok Sabangya nung AYUSH Hospital yangluba dak sendakba Technical Test Report atema anogo 5 tsüngda senden ka ayongtepang ta Chungtia Students' Union (CSU)-i Principal Director, Health and Family Welfare Department nem mapang züngzüksütsüogo.

Executive Engineer, Medical Engineering Division, Kohima ajanga September 29, 2025 nü technical test report ka agütsüba nung temulung masür. Iba report nung mapa shitak meinyakba aika tuteta shia lir aser iba ajanga Northeast Engineer temi mapa meijungi inyakba aser tim mesüi inyakba kuli agütsür ta CSU Convenor Zaongtoshi aser President Tsuknungtemsu nati Principal Director dangi züluba shidi nung shia lir.

September 11, 2025 nü Chungtia Students' Union, Chungtia Village Council, KC Infra Projects Pvt. Ltd., aser bangdak department nungi ketdangsürtemi test results anguba sülen joint follow-up meeting ka alitsü mulungtepa lir saka report agütsür anogo 9 süiaka tang tashi department-I senden mayonger ta Chungtia kaketshirtemi ashi.

"Onoki aiben nü office den tongtepratepogo saka telangzüba kecha mali. Metensür tang tashi nung nü dang nungi official correspondence kecha mali anungji nür department-i mapa inyaktsü atema anogo 5 züngzüksür. Iba mapang tsüngda mapa kecha meinyakra onoki kechi junger ta bilemdir inyaktsü aser iba asoshi onoki tebilemetsü khuret kecha mabentsü" ta CSU k e t d a n g p u r t e m i s a metetdaktsüogo.

NSF-i CM Neiphiu Rio dangi onük 9 shia shidi zülu

Dimapur, October 9, 2025

(TYO): Naga Students' Federation (NSF)-i Nagaland Chief Minister Neiphiu Rio dangi shidi ka zülüogo aser iba nung Naga nunger tarutsü dak kongshiba tebilemetsü kar lemsatepogo.

CM Rio lenisüba kübok sorkari mapa tajungtem inyaka aruba atema tenüngsang agütsür aser sorkari tang rongdak onük 9 inyaktsü ayongzüker ta NSF President Mteisuding aser General Secretary Kenilo Kent nati shidi nung shia lir.

Indo-Naga yimten ken o ya Naga nunger tamendakdak lir anungji state sorkari tenüng atema masü saka Naga nunger ajak dena aser Naga litsü ajak ka küma tatembang lemtet ka agitsü atema inyaktsü nenshir ta NSF-i ashi.

Nagaland-i ozüng alema arurtem mazüokba ajanga lisopur kintem samaa aotsü tia ajurutsü. Anungji Inner Line Regulation (ILR) atema special commission balaka amenoktsü aser district tem nung enforcement wings tentettsüla. Maneni Dimapur railway station aser airport nung ILP office tem lapoktsüla aser ozüng alema aruba khuret azüoktsü atema local councils den amalitep tajung ayutsüla ta NSF-is ashi.

Nagaland nung backdoor appointments onsara lir aser iba inakyim ajanga ochishiba aser tajungtem shimba samatsür. Anungji sorkari ozüng alema

mapa nung nisung shimokba anentsüla aser NPSC o NSSB ajanga dang aniochtsüla. Ozüng alema inyakba ketdangsürtem merenshitsüla ta NSF-isa takhangba agütsü.

Nagaland nung full-fledged government engineering college ka mali anungji 2026-27 academic year tashi nung Khelhoshe Polytechnic Atoizu (KPA) ya government engineering college ka akümtsüla ta parnokisa ashi.

Nagaland University aser National Institute of Technology (NIT) Chumoukedima nung mapa inyakertem rongnung lisopur mali anungji teaching aser non-teaching mapatem nung lisopur Naga nunger asoshi mapa 80% 'reserved' asütsüla. Iba takhangba ya Arrla 371(A) ajanga metentsür aser Nagaland nung tazünger lanur aika mapa mangu lir ta NSF-isa metetdaktsü.

Sorkar ketdangsübaren ajungtsü atema tashishitsü melii inyaktsüla anungji department ajak nung e-Governance systems mapa tenzüksüla. India sorkari GIGW guidelines agütsüba ama inyaktsüla aser department temi digital platforms aser mobile technology amshitsüla. Iba ajanga ochimashi agentsü aser service delivery tajungba agütsütettsü ta parnokisa takhangba agütsüogo.

Naga lanurtem mapa manguba khuret tulu ajurua lir anungji MLA shiai pei pei constituency nung

UPSC agütsünürtem yaritsüla, NEP 2020 framework ajanga skill & vocational training tashi itdaktsütsüla aser entrepreneurship o self-reliance adokdaktsütsü atema CM Micro Finance Initiative ya tuluba akümtsüla ta NSF-isa CM Rio dang metetdaktsüogo.

Armed Forces (Special Powers) Act (AFSPA) ya tashiyim aketba ozüng ka lir aser iba ajanga mapang talangka Naga tesemtem nung timtemtoushi agüja arur anungji state sorkari national forums nung AFSPA ajunga agentsü atema jembitsüla aser temeten o yimjung atema ola adoktsüla ta NSF-isa ashi.

Centre sorkari Free Movement Regime (FMR) agienba aser Indo-Myanmar arrtsü atsüdangba magizüker. Item inakyim ajanga küm noklang aika arrtsü anatsülen aliba Naga nunger sobaliba aser tesentaktep nung kongshir anungji state sorkari ibala tim masüba policies magizüksüla aser arrtsü anatsülen alirtem tesentaktep kümzüka ayutsü atema ola adoktsü ayongzüker ta NSF-isa CM Rio dang ashi.

State sorkari temeten, ochishiba aser kechisarena nung terenlok bener arutsü atema inyakba mapa nung NSF-ia amalitepa inyaktsü mulunga lir aser Chief Minister lenisüba kübok Nagaland nung yimjung aser terenlok angutsü imlar ta parnokisa CM Rio dang ashi.

Nagaland nung Tobacco Free Youth Campaign (TFYC) 3.0 tenzükögo

Dimapur, October 9, 2025

(TYO): Ministry of Health and Family Welfare (MoHFW), Government of India-i tobacco control aser tobacco-free generation alizüng yur Tobacco Free Youth Campaign (TFYC) tenzükögo aser iba ya 2023 nungi kümshia inakyongga arur.

2023 aser 2024 nung campaign ana takok ngua agitetba sülen Nagaland nunga Tobacco Free Youth Campaign 3.0 indang State-level launch agiogo.

Iba sentong ya October 9, 2025 nü Baptist College, Kohima nung Department of Health & Family Welfare, Nagaland kübok National Tobacco Control Programme (NTCP) ajanga ayongzüka agi.

Commissioner & Secretary, Health & Family Welfare Department Anoop Khinchi, IAS-i Tobacco Free Youth Campaign (TFYC) 3.0 tenzüksü.

"Mapang shitak ka nung iba sentong tenzüker kechiyong

Nagaland nung tain aser tanurtemi tobacco kanga amshir. Asenoki iba mapa ya tuluba inyaka aotsüla" ta Anoop Khinchi-i ashi.

Iba ya public health tayongzükbaba tulu ka lir anungji department tem yaritepa inyaktsüla, tobacco vendor licensing aser capacity building maparen inyaktsüla ta pai ashi.

"School shiai tobacco-free sangdongtsüla, yimtsüng shiai ozüng benoka inyaktsüla. Tobacco mamshitsü ta ashiba lanur shiai Nagaland tajungba akümtsü atema mera agir" ta Anoop-isa ashi. Iba sentong nung paisa Anti-Tobacco Pledge agidaktsü.

"TFYC 1.0 aser 2.0, Nagaland kübok Tobacco Free Educational Institutions aser Tobacco Free Villages aika sangdongogo aser COTPA, 2003 o PECA, 2019 maparen tashi itdaktsüogo" ta Directorate of Health & Family Welfare Principal Director Dr. Mereninla Senlem-i ashi.

Global Youth Tobacco Survey (GYTS-4) ajanga Nagaland nung school-i aoba tanur arishi küm 13-15 tsüngda alir 43% ajanga tobacco amshir ta ashir ta lai ashi.

"Sorkari lanurtem rongnung preventive health aser behavioural change maparen inyaker. Kaketshirtemi iba campaign asoshi ambassador tem ama inyaktsüla aser tobacco amshiba ajanga temang nung timtem bentsür aruba osangtem prokshitsüla" ta Mission Director, National Health Mission, Nagaland Dr. Keveduyi Theyo-i ashi.

Anogo 60 nü campaign ya kanga tongtipang anungji district shiai daily reporting, reviews, aser field action ajanga mapa inyaktsü ayongzüker ta Dr. Keveduyi-isa ashi.

Iba sentong nung State Nodal Officer, NTCP, Dr. I. Simon Sumi-i TFYC 3.0 indang nükjidongtem aser sentongtem lemsatep.

Mokokchung nung Tobacco Free Youth Campaign tenzükogo



Dimapur, Mongputeni/Oct. 09 (TYO): District Tobacco Control Cell, Mokokchung ajanga October 9, 2025 nü Christian Residential Higher Secondary School (CRHSS) nung Tobacco Free Youth Campaign (TFYC) 3.0 tenzükba sentong ka ayongzuka liasü.

Lanurtem moko nungi pila alitsü ajungmesotsü nükjidong nung iba sentong ya National Tobacco Control Programme (NTCP) kübok agia liasü. Sentong nung CRHSS tesayur

Sashi menden liasü aser lai pela agizükba o jembi.

Dr. K. Tiasenla, District Nodal Officer, NTCP, Mokokchung ajanga iba sentong ayongzükba nükjidong rateta jembiidang, TFYC 3.0 nükjidong aser tang lanurtemi moko amshiba tebilemsü aser 'tobacco-free generation' adokdaksütsü asoshi kakat reju temi tongtipang shilem agitsüba indang lemsatepa liasü.

Iba campaign ya Dr. Ademla Tinu, Medical

Superintendent, IMDH, Mokokchung ajanga tenzüksü aser kakatshirtem dang moko mamshi alitsü asoshi ambassadors akumtsü ajungshi aser nisung ajak dang pei aliba tesem nung moko mamshitsü ajungshitsü asoshi pei teinyaksü ama agizüksü ayongzuka liasü.

Nukshiwati Longchar, Consultant, NTCP, Mokokchung lenisüba nung melepzüng o jembi den tenangzüktep agia liasü.

Kohima nung State Level Tribal Painting Competition agi



Dimapur, Mongputeni/Oct. 09 (TYO): Department of Tribal Affairs, Nagaland kübok Tribal Research Institute ajanga District Administration aser District Education Office, Kohima den lungjemer October 9, 2025 nü Deputy Commissioner Office, Kohima nung Tribal Students atema State Level Tribal Painting Competition ayongzuka liasü.

Iba sentong ya Janjatiya Gaurav Varsh 2024-25 benjongmung nung shilem ka ama "My State My Pride" omen

nung ajemdaker ayongzük, kong District Education Office (DEO) Kohima kübok school 18 nungi tribal students 36-i shilem agia liasü.

Iba painting competition nung mezüngbuba jenjang ya Josinlo Kemp (Bayavü Higher Secondary School), tanabuba jenjang Nisuka (Bayavü Higher Secondary School) aser tasembuba jenjang Watlong Wangha (GHSS Jotsoma) nungeri ngua liasü.

Consolation Prizes ya Lerao (GHS, Midland),

Bupenmongko Chang (GHS Bayavü), Chekehie Akami (GHSS Jotsoma) nung nem agütsü.

Takoker shia nem kulizüng kakat den senpet agütsü aser shilem agir ajunga nung kulizüng kakat agüja liasü.

Iba tetoktepba nung tetendangertem ya Y Ayem Kongyak, Khrieketounou Lizietsu, aser K. Onglingaku Chang nungertem liasü.

Iba tetoktepba tembangba sentong nung Department of Tribal Affairs, District Administration, District Education Office nungi ketdangsürtem, tesayurtem aser kakatshirtem dena liasü.

Sentong nung Deputy Commissioner Kohima, B Henok Buchem, NCS ajanga kakatshir nem tenütsang agütsü aser "One Day with DC" sentong indanga lemsatepa liasü.

Akhoya yimteni RCCJ Memorial GHS lenmang yanglushitsü



Akhoya yimteni October 07 anogo nung R. C. Chiten Jamir Memorial Govt. High School, Changtongya lenmang yanglushitsüba noksa nung angur.

CTN. October 09 (TYO) : Changtongya town nung R.C.Chiten Jamir Memorial Govt. High School-i aiba lenmang mejungi aliba repringteta Akhoya yimteni lisem lung bener arua lenmang tapok aser lishi alidak tesem ajak nembangja inyaksüogo.

RCJCMGHS ya Changtongya town kübok süaka Akhoya nunger lushi nung asüba agi Akhoya yimteni yakanü October 7 nü to Excavator aser dumper truck amshia inyaksüogo. Iba mapa nung Akhoya yimten tatar yimsüsürtemi shilem agia liasü.

Iba ama tongtibang lenmang ka yimten nübo aser rongsen endoka inyaksüba atema School Management & Development Committee aser RCCJ GHS nung tesayur aser kakatshirtemi Akhoya yimten dang kanga pelaba o sangdong ka ajanga metetdaksüogo.

CNCCI ajanga Dimapur Police nem tenütsang agütsür

Dimapur, Mongputeni/Oct. 09 (TYO): Dimapur Police-i kanga kera mera agia Dimapur nungi shishilempar pezü pua bener oa aliba October 8, 2025 nü kumzüba atema pelaba lemsateper, ta Confederation of Nagaland Chamber of Commerce and Industry (CNCCI) ajanga sangdong ka nung ashi.

Maneni CNCCI-i police dang aibelener pua iba mapa tamajung inyakba telok nem tapet temerenshi agüja tatishitsü tajung sayua tarutsü nung iba ama meinyakdaksütsü akhanger.

Police temi iba ama teyakyak aser tasü tait mera agiba ajanga nüburtemi parnok dak tamang katetba kisüing masü saka asen yimti kumzüka ayuba nung tongti shilem agir aser shishilempartem tetsübo makai inyaksangshitsü tensa tajung yutsür, ta ashi.

Iba ama aiben ataloka lir, saka tetsübo aser amokmerenba

mechi temai madoki yutsür. Shishilempartem pua aser camp balalai jaokba ya tesasatsüka, tanen makai atalokba tebilemsü ka kumogo.

Telungpur temi iba ama inyakba ajanga shishilempar aser nüburtem teimla maka kumdaksür, kechiaser pei takum aser kinunger asoshi bilemer, ta CNCCI sangdong ajanga ashi.

Anungji Dimapur Police dang Naga National Movement tenüing nung iba ama mapa tamajung inyakba nung shilem agir nisung aser telok tenüingtem atsü-anem makai yimjak nung sangdongtsü ajungshir. Iba ama inyakyim yagi Naga National Movement ochi tangatetba nung tetsükdaksü agütsüba kisüing masü saka Naga nüburtemi aginüba ama inyakba nung aser 'Nagaland for Christ' noksa menentsür, ta CNCCI sangdong ajangasa ashi.

Dimapur Police-i nisung pezü kumzük, parnok apur pezü apu



Dimapur, Mongputeni/Oct. 09 (TYO): Mejangjaba nisung kari October 8, 2025 nü Patna, Bihar nungi nisung ka Hotel New Rajasthan Palace nungi pua bener ao ta osang tejangja kar angazükba nung ajemdaker East PS Personnel, SOT Team aser IR Personnel densema Police Team ka tentet.

Technical inputs tem benden aser iba team ya temulung melemi aliba tesemtemi yok. Parnoki iba nisungba pua yua aliba tesem südi ta temulung melemi aliba jangjar operation ka agiba nung Police

Team-i kasa anogo United North Block, Burma Camp Area nungi nisung pezü kumzük aser nisung pezü apu.

Iba dak sendakba nung East PS nung ken o ka benoka bushisüingdangba mapang lir. Tang pua alir par pezü ya Saul Chophy (48 Yrs), SS Rajapeyu NSCN-IM; Bento Shohe (37 Yrs), SS Khapur NSCN-IM; Kavito Yephtho (42 Yrs), SS Tatar NSCN-IM aser Kivipu Zhimo (21 Yrs) alitsü ta Dimapur Police sangdong ka ajanga ashi.

Tuensang nung Table Top Exercise aser senden amen

Dimapur, Mongputeni/Oct. 09 (TYO): Deputy Commissioner, Tuensang, Lithrongla Tongpi Rutsa, NCS lenisüba kübok Table Top Exercise cum preparatory meeting ka October 9, 2025 nü Deputy Commissioner, Tuensang indang Conference Hall nung mena liasü.

Iba senden nung Itanagar nungi NDRF team ajanga DDMA züngsemtem, Fire Services, Medical Department, Police Department nungi adener dang alimar lendong timtem mashi mapang ajurudang renema alitsüba yimyatam PowerPoint ajanga

lemsatepa liasü.

Alimar lendong aser nisungi yangluba lendong timtem mapang asü-amaba nungi jenbua alitsü asoshi stakeholders aser sorkar aser NGO agency balalai mera agitsü angatetdaksütsü nükjidong nung Table Top Exercise ya ayongzuka liasü.

Iba senden nungsa district nung iba ama lendong-tsüdong mapang asü-amaba mesüra timtem ajuruba ajemdaksütsü aser renemshiba sentongtem tajungba kumdaksütsü mechi NDRF aser DDMA Tuensang den sensaksema liasü.

PM Modi-i India-UK na tesendaktep akangshiba metetdaksü



Mumbai nung United Kingdom Ato Kilonser Keir Starmer den delegation-level senden amenba mapang Ato Kilonser Narendra Modi tangokba noksa nung angur.

Mumbai, Mongputeni/October 9 (Agencies): Ato Kilonser Narendra Modi-i Brehostibarnü ashiba agi, India aser UK na tesendaktepba nung tashi tasenka lir. British Ato Kilonser Keir Starmer den sensak asemba sülen PM Modi-i iba olen lemsatapa liasü.

Starmer, shibai Ato Kilonser ama tang mezüngbuba India semdangdar, pai PM Modi den Mumbai nung bilateral sensaksem agiogo. Sensaksem ya shishilemba, technology cooperation aser linük ana tsüngda strategic tesendaktep dak rangloker agiogo.

"PM Starmer lenisüba nung

India aser UK na tesendaktep renloka aoba ngudar. Taküm July ita ni UK semdangba mapang onoki otsüsüsüsa Comprehensive Economic and Trade Agreement (CETA) nung sign süogo," ta PM Modi-i Stramer den külem sangdong ka ajanga metetdaksü.

Lenir ana ya Mumbai nung agiogo aser UK lenir yagi taküm küm tetenzüklen linük ana tsüngda angati shishilemba atema nangzükteper aliba takaratiba nung benoktsü atema nongshia liasü.

Linük ana tsüngda taküm July ita sign asüba Free Trade

Agreement (FTA) ya kanga tongtibang ta shia Stramer-i taoba mapang ashiba agi, "onoki European Union toktsüba sülen iba tenangzükteperba yangluba ya ajak dang tulutiba lir. India atema-a iba ya tenangzükteperba rongnung tulutiba asütsü ta ni bilemer, anungji iba ya kanga tongtibang lir."

UK-India Free Trade Agreement (FTA) koba Ato Kilonser Narendra Modi-i July ita UK semdangba mapang sign süa liasü, iba ya linük ana tsüngda kümshia pound billion 25.5 shishilembateptsü nükjidong nung yangluogo.

Kishor-i aniba Jan Suraaj party-i candidates 51 tenüng sangdongogo

New Delhi, Mongputeni/October 9 (Agencies): Prashant Kishor-i aniba Jan Suraaj Party-i Brehostibarnü taruba ita agitsü aliba Bihar assembly election atema candidate 51 tenüng sangdongogo. Party-i district 26 nung assembly menden 51 atema candidate tem tenüng sangdongogo.

Toba mapang strategist aliba nungi politician akümsang Kishor, shiba tang mezüngbuba assembly elections nung tokteptsü lir, pai Jan Suraaj party ya Bihar nung party tongtibangtem rongnung tasembuba kümdaktsütsü

merangdar, kong küm aika party anati dang amokbanger arudar.

Candidate tem rongnung Valmiki Nagar nungi Drig Narain Prasad, West Champaran districts nung Lauriya nungi Sunil Kumar, Harsidhi nungi Awdhesh Ram aser East Champaran kübok Dhaka nungi Dr Lal Babu Prasad nung densema lir.

Osangbenertem den sensaksemba mapang party national tir Udai Singh-i ashiba agi, Kishor-i October 11 nü Raghupur nungi nüboyimba sentong tenzüktsü akok. Raghupur ya RJD lenir

Tejashwi Yadav indang constituency lir.

Party-isa, Sursand nungi Usha Kiran, Runnisadipur nungi Vijay Kumar Sah, Benipatti nungi Md Parvej Alam aser Nirmali nungi Ram Pravesh Kumar Yadav nung shimogo.

Bihar assembly elections ya shilem ana küma lemsar agitsü. Mezüngbuba shilem November 6 aser tanabuba November 11 nü agitsü aser result November 14 nü sangdongtsü.

Bihar nung assembly constituency 243 lir, kong menden ana ST aser menden 38 SC atema mekazüka tokja lir.

Tamil Nadu health minister-i union, MP sorkar aitsü

Chennai, Mongputeni/October 9 (Agencies): Cough syrup Coldrif nung mim keta aliba indang osang agütsüba sülena union aser Madhya Pradesh sorkari kecha jenjang magiba atema Tamil Nadu health minister M. Subramanian-i parnok aitsüogo.

"Madhya Pradesh-i onok dangi October 1 nü shiti yokba sülen Tamil Nadu-i tarkaratiba nung bushisüngdang asü aser mim keta aliba indang Madhya Pradesh, Union Ministry of Health and Family Welfare aser Odisha aser Puducherry nung nem osang agütsüogo. Ajisüaka Madhya Pradesh aser Union sorkari odang toktsü aser ashiba agi mozü (Coldrif) nung kecha tai mali. Ajisüaka mozü koda menena ali aji jangjaogo aser October 3 nü iba mozü yangluba anentsü tetuyuba agütsüogo," ta Subramanian-i ashi.

Tamil Nadu kübok Kancheepuram district nung Sresan Pharmaceutical Manufacturing-i yangluba Coldrif cough syrup ajemba ajanga tanur 21 tashi asüba sülen Tamil Nadu-i drug keetdangsür tejen ana suspend sütsüogo. "Taoba küm ana tsüngda iba amala mozü kanga junga masadangba atema drug inspectors tejen ana suspend sütsüogo," ta Subramanian-i ashi.

Madhya Pradesh police-i, Sresan Pharma proprietor aser manufacturing chemist G.

Ranganathan, Chennai nung par kidang apuba sülen health minister-i iba olen lemsatapa liasü. "Pai telangzüba agütsüba sülen onoki pa indang pharma company license teti atema thitsütsü asoshi jenjang agitsü. License ya khen atema thija lir," ta Subramanian-i ashi.

Sample tendangba sülen mozü ya non-pharmacopoeial grade Propylene Glycol amshia yangluba ngutetogo, koba Diethylene Glycol (DEG) aser Ethylene Glycol agi menentsür alitsü akok, koba nephrotoxic aser mim lir," ta Tamil Nadu Drugs Control department deputy director S. Gurubharathi-i ashi.

Tamil Nadu sorkari Coldrif syrup ya mali, kechiyong sorkar clinic aser mozüki ajak atema mozü ya Tamil Nadu Medical Services Corporation (TNMSC) nungi alizüker.

Ranganathan aser analytical chemist K. Maheswari na nem anogo 5 tsüngda langzüksü atema tasüngdangba 16 keter October 7 nü notica ka agütsüogo. Manufacturing unit ya shibanga lir asünung notice ya building number 787 kishi nung maloktsüogo.

October 1 nü Madhya Pradesh sorkari osang agütsüba sülen TN sorkari iba mozü mayoktsü atema tenokdangba agütsü. Tamil Nadu-isa, Puducherry aser Odisha amala state nema osang agütsüogo, kong iba mozü ya Tamil Nadu nungi bener oa liasü



Canberra, Australia nung Australia Ato Kilonser Anthony Albanese (tabelen) aser Defence Minister Rajnath Singh (teyong) na tangokba noksa nung angur.

Kibong shi nem sorkar mapa kaka agütsütsü Tejashwi-i nangzük

New Delhi, Mongputeni/October 9 (Agencies): RJD lenir Tejashwi Yadav-i Brehostibarnü election atema nüboyimba mapang, par party-i sorkar kümtetra Bihar nung kibong shia nung nisung kaka nembosa sorkar mapa agütsütsü, ta tenangzükba agütsüogo.

Osangbenertem den sensaksemba mapang Yadav-i, sorkar kümtetra sülen anogo 20 tsüngda ozüng tasen ka yanglutsü aser iba ajanga sorkar mapa atema guarantee agütsütsü, ta sangdonga liasü.

Yadav-isa, office mapa agizüker ita 20 tsüngda iba scheme ya state ajunga nung benoka inyaksangshitsü ta shisem.

"Onoki sorkar kümtetra sülen kibong shia nung sorkar mapa inyaker kakabosa adokdaksütsü atema onoki

inyaktsü. Onoki iba atema sorkar kümtetra sülen anogo 20 tsüngda ozüng tasen ka yanglutsü aser ita 20 nungbo kibong ajak nung nisung kakabosa sorkar mapa inyaker alitsü," ta Yadav-i ashi.

Bihar nung assembly elections agitsü lia Yadav-i iba tenangzükba ya agütsüogo. Assembly menden 243 atema election ya shilem ana küma lemsar November 6 aser November 11 nü agitsü aser vote tem November 14 nü azüngtsü.

Tatembangbuba list nung voter ajak agi crore 7.42 lir, koba taküm June 24 tashi nungbo crore 7.89 liasü. Election Commission sangdong ka ajanga ashiba agi, voter lakh 65 draft list nungi aginogo aser August 1, 2025 nü tashi nung draft list nung elector tem crore 7.24 liasü.



Surat nung industrialist Ratan Tata asüba anogo pa nem tetushi agüja kaketshirtemi shimo milen tsükloksüba noksa nung angur.



TIR YIMYIM YIMOBILEM (EDITRIAL)

DIMAPUR FRIDAY, OCTOBER (MONGPUTENI) 10, 2025

Tanurtem den külemi ...

Tanü tanurtemi pei tetsü oshi mejembir, chi sorutsübo toktsür peisasa süngo ya yanglua mejembiteter, süoshi shitok mashi aser pei süoshi nung iron agütsütsüjibo otsü maka. Aji oda, azü aser danübo nisung dang nungia temeimba meima amshir saka kidang nüngdak asoshi metsüba ak aser antembo terepranga merepranger. Tsüraburtembo pei lu nung mapa meranga inyaker saka tanurtemi iba luji mangu, kechiyong tsüraburtemi parnnokji anir maor, anungji tsüraburtemi parnok asoshi inyaksüba kecha hau ta mali, nüngdak makaba mapa ka inyaker amaidang bilemer .Iba jagi tanur aikati tain kümaka kibong akümtsü khuretsa mebilemer aser kibong akümer aika kibong kümer piesasa soruchioka mechiyongtet aser kibong nüngdak achaayang mesütet baladoker. Item tebilemtsü aser tamakok ajakji asenoki tanurtem dangji atonger, saka kodang jungjunga bilemdangdir parnok masü asenok tsüraburtem taia ta angatetsü, kechiyong asenoki parnok dang mapa inyaksü mesayuba agi parnoki mashi aser memetet. Ashiko, ibaji asenoki parnokji kangasa meimba agi mapa ajak asenoki inyaker mesüra kidang alir kilirtem nem inyakdaksür asütsüa akok. Temeim agi mim akümbaji ibaji lir. Akhidangbo, ki mapa nung süli, alu mapa nung süli, tsüraburtem o tanurtem na külemlüemi inyak, anungji tsürabur o tanurtem naji medemer ama anogo shia pei tetsü oshi agi sensaksema anogo süitemdaksü. Aji oda, tsüraburtemi tanurtem tila asüdang aonung shia lipok aser mulungdangtsü tar nung otsü ashiba agi tanurtem taküm jakla yimya aser awashi nunga junga intet aser sobaliba meteta aküm. Iba amaji mapa nunga tsüraburtem den külemi inyaker asünungji, ki aser alu mapa ajak meteta aküm . Ibayongji, kibong kümer peisasa pei kibong bener otet. Ajisüaka, tanübo tsüraburtemi pei chirnurtem anir pei alu mesüra farm-i anir maor, anungji tanurtemi mapa inyak mangazük aser memetetba dang masü saka parnoki parnok meyong lu aser arem mangu, anungji itemji parnoki pei tsürabur senmanga ta tebilema mebilemer. Aji oda, tsüraburtemi kidanga tanurtem den külemi ki mapaa meinyaker aser sensaksemaa mamener aser mapa nunga külemi menokdaker, anungji tsüraburtem o tanurtem na o jembitsü mapang mali akümer. Iba amaji tanurtem intetdaksüba agi, parnok tain akümdang kidang jembiba tetsü oshi masü saka yimdong nung medemertem den jembiba tzümar oshi angazüker arur. Tanü asen kibong aser lokti nung asen tetsü oshi samaba tera aser kuliji aji lir. Aji oda, pei tetsü oshi mejembitet aküm nungji, pei kin kidong indanga memeteti aküm, anungji kibakiyimtsü mapang arudanga kin kidong asüngdangtepa sobaliba melaba ama tim kibalembutsübo melen, tebursang asoshi pai aginüba tetsür süra ojang aser tetsürla asoshia lai aginüba tebur süra ojang ta ser kibalembuteper. Ibajia tanü asüngbo kecha mashishii apuani kuma kibong kümtsütsü asoshi arogo aika tenteta lir. Aji oda, kibalembutsü atema kidong mashishii akümba nungi tenzüka, joko, tangbo asen lima nunga tetsür o tetsür na aser tebur o tebur na apuani kuma alitsüba jia tim mapa ka amai kuma aotsü ana nung lir. Item ajakji, nisung ka tanur asüdang pei kidang tsüraburtemi junga mesayutetba nungi tenzüka tebilemtsütem lir. Asenok tsüraburtem aikati tanurtemiang asenok nem külemi sensaksema amentsü mesüra külemi mapa inyaksü mapang magütsür amai bilemer, saka shitakba nungbo parnoki masü asenokiang parnok asoshi mapang magütsür. Aji oda, asen tanurtem jar külemi süngo marok ka yangluba ajemba aser külemi soruchioka chiyongba mapang pei oshi jembitsü angazüker aser sobaliba meteter. Ashiko, kibong kar nungbo tanurtem masü saka tsüraburtemiang mobile phone tamshiba amshia alitsüa akok, ajisüaka mobile phone amshidang endokba mapangji tanurtem den sensaksemdang aser parnok dang sobaliba aser mulungdangtsü otsütem ashiba nung endoktsüla. Iba jagi tanur tajung akümtsü, anungji alimaa tajung asütsü.

OLEMSABANG

TANÜ TECHNOLOGICAL ADVANCEMENT AJANGA LANUR AIKA MEYOKOGO:

~ IMSUMONGBA

Tanü alima kanga kara melenshia aoba jenjang ka nung asenok alir. Shisatsu tasen pokteta, renlokba den maparen ajak nung tejenba nungi tasenba tajungba aser tekaraba inyaka aoba angur. Alima shisatsü maparen ajak kanga kara renloka aoba putu nung lanur ka nukjitong tongtetsü asoshi kumdanga, shisadanga, shisa kaa, shimteta meinyakra, tamakok nung tempangtsü ana nungdang lir.

Tanü putu lanur ajak ya tashi temetet dang, parnok jenjangji reprangdangra taso dang nungi meteter asoba ama shsiatsü, intellectual nung kanga mongin ka ka lir. Nai lanur kar dang 'O' ka shidangra pa/ lai tabensaba aser terajemba nung meyiptsüba putu. Anungji lanurji tasür asenoki parnok anua bilemtsü mesüra tokteptsü tamakoktsü, kechiaser, parnok anishiba tesayur ka teti parnok den tena lir ta metetdi.

Tanü alima ya, alima tashi agi bener aoba putu, alima ajonga ya meimchiri puratetba technological advancement agi amokpanger, maparen balala ajak tezübaba, tekaraba, tajungba, temelaba nung inyakba angur. Alima ainba amaji kija kibonga iba tashi nung ni, ozü tama, tuluba takarba asütsüta asüba tanela aser temolungtetba nung arishia toktepba tensa ka agi menepogo. Item ajak ya iba technological advancement tashi ajanga lir.

Adangji iba technological advancement ajanga alima nübur nem tajangzük terenlok bener arutsüba aika lir, saka iba tashi agi puatoker iba dak rangloker dang jajara lanur ka alizüng matongtsü, kechiaser tanü putu lanur ka taküm tanela, shisatsü yimya sobaliba jembishinü ajak iba technology ajanga azüoker, aser sayur, anungji tanü lanurtem aikati par tsürabur, Tsüngremji melen iba technology ya kümdaksüogo.

Tanü asen tendak asen tanela jenjang ramia kümdaksüba tiazü tesayur, teshitetertemji shirnok?

Technology, star worship culture, internet social media, digital technology, mobile phone, film star, sports star, fashion star, rock star, etc.

Item yagi lanur aika puatoker tanela shi jenjang ajonga alener moksepdaksüogo. Adangji iba culture aser technology medeni lanur ka tejakleni aotsü maokok. Saka iba culture/technology nung taküm, tanela jenjang raksatsütsü miim tasa tulutiba dena lir. Iba technology ajanga..

1. Tang alima nung kechi ataloker pei takdang nung mener aji angur
2. Nai kechi aginer kechi jangrar aji agütsür.
3. Atepzündang mena yur mile noklang aika atema oa alila/ alisang den tongtepratepa maparen inyaker.
4. Kidang mener shishilembaba maparen balala inyaker
5. Nüktangpangta japujari mapatemji temenmen masü saka alimar teinyaksü ka ama sayur.
6. Tetsür tebur mebandang meimtepba aser kazütepba fashion ka ama bilemer aser odi odia prokshiba angur.

Lanur ka asoshi tsüraburji masü, Tsüngrem masü, saka pa/ la ket nung aliba mobile phone/ internetji aika asoshi tsüngrem, tembar tajungtiba kümdaksüogo. Ibayongji tanü lanurtem pei tsürabur den sensaksemtsü mapang magütsür, kibong tekülem nung kodanga matener, tekülem mapang lanurtem mobile phone den mena alir, tsürabur adianu joko ainer ka ama libaliro, yimya ajanga sayur. Tsürabur adianu den tepela, khuret lemsatep, sensaksem maka, yimjung aser temeim saobaliba tajung to samaa ogo.

Khositaji dang lanur ka taküm tanela nükjitong tongtsür ta mangatetsüsa iba technology tashi ajanga tangatetba aser tesayuba tasen agütsüogo. Ibayongji American philosopher & Professor Groothuisi yamai ashir

"Tanu joko technology balala ajanga lanurtemi pei tsüngrem masü saka item tsüngrem külemer."

Tanu lanur aika tasü tsüngrem den mejanga lir, tzümar sobaliba ama, odi ako, oya, onü, anuk etc, jayajako memetet saka aunty, uncle, papa, kokai yamala mesükba agi melener. Saka suposulemtsübo, latest fashion, latest mobile handset nung dang linuba item tashidak ajakji technology dak amangba, külemba, iba nem meyokadokba nungi adokba. Tanü alima ainba jenjang nung lanur mejajatsü ta meshitet, saka pei tamangba, sobaliba dak mapetba pei tia kibong jenjang den mapetsur nung iba culture nung aliba ajanga nisung ka tejakleni aoba dang nungi telungi yokbaji tuluba asütsü, anungji item jagi pa/ la nükjitong leman shipangtsür ta meteta salazüka tokjang. Kechiyong shin o ka nung yamai shia lir, "Petinutem dak rangloker jajara ne jakdang leman nung kechi ali mongui ne sasa kangla nung tsütsü"

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nigeria nung pua bener aoba pastor ka alangzüktsü sen agütsür tepset

Abuja, Mongputeni/Oct. 09 (Agencies): Nigeria anüolen pastor ka pua bener aoba alangzüktsü sen 5 million naira (\$3,125 USD) agüjaka tepset, koba Fulani telungpur dak temulung melemteti lir ta osangtem ajanga ashir.

Kwara state kübok Ekati area nung Evangelical Church Winning All (ECWA) indang pastor Rev. James Audu Issa ya August 28, 2025 nü Ekati town, Patigi County nung ECWA premises telungzük nung par kidang nungi pua bener aoba sülen October 2, 2025 nü arem nung tasümang ngutet.

"Kwara state nung Edu aser Patigi Local Government Areas nung kiralongra mapa inyakba Fulani bandits temi pastor ya tepset," ta yangji alir Peter Kolo-i ashi.

Pa apur temi mezüngbo sen 100 million naira (\$62,500 USD) meshi, ta Kolo-i ashi.

"Pastor kibong aser Ekati nüburtemi sen 5 million naira agütsütsü jembizük aser parnoki iba sen ya pastor alangzüktsü asoshi agütsü," ta pai ashi.

"Sen 5 million naira ya meshiba sülen bandits temi taochi mesayui ano sen 45 million naira (\$28,125) meshi. Tia maka, iba atema jembishinü masü dang Rev. James Audu Issa ya Fulani bandits temi tepset."

ECWA indang odongtar Rev. Romanus Ebeneokodi-ia Audu

Issa tepsetba indang sangdong ka agüja liasü.

"Iba tai maket pastor ya tepseta pa kinungtsü, chirnur, kinunger, arogo aser tembartem mulung zürep tia nung yutsür," ta Ebeneokodi-i ashi.

ECWA indang Today's Challenge Magazine yimozülur Ralph Madugu-i Audu Issa tepsetba ya Khristanpur aser parnok pastor tem aika dak tenük yoker lendong timtem agütsüba rongnung ka lir ta ashi.

"Ajisüaka sorkar ketdangsür karibo Khristanpur ajunga samatsütsü merangba mali ta ashir," ta Madugu-i ashi.

Muslim Fulani ya Nigeria aser Sahel nung million aika lir, shirnok tezü balala nungi jakzük aser aikati yimsü taroktiba mamshir, saka Fulani kari radical Islamist tesayuba sülen anidaker, ta United Kingdom indang All-Party Parliamentary Group for International Freedom or Belief (APPG) ajanga 2020 report ka nung ashi.

"Parnoki Boko Haram aser ISWAP tasa mesüktepa amshir aser Khristanpur aser Khristanpur maitsü dak tenük yokba tejangja sayur," ta APPG report ajanga ashi.

Nigeria indang Middle Belt nung shiruru metsürtemi Khristanpur dak amakba ya parnoki Khristanpur li tashiyim amshia agitsü merangba aser Islam yimsü benoktsü merangba ajanga lir, ta Nigeria nung

Khristanpur lenirtemi ashir.

Alima nung Khristanpur alitsü asoshi Nigeria ya tamajungtiba linük lir, ta Open Doors indang 2025 World Watch List ajanga ashir.

"World Watch List methodology kübok iba linük nung Khristanpur anema azüdokshiba ya "maximum" nung lir," ta report ajanga ashi.

Khristanpur ya linük North-East aser North-West dang nungi North-Central zone nung timba lir, kong Fulani militia temi aluyimer dak maka noklang aika tepseter, kong Khristanpur timba lir ta report ajanga ashi.

Linük northern states len Boko Haram aser razüka aoba Islamic State in West Africa Province (ISWAP) ama jihadist telok tem kanga yakyaka lir, kong federal sorkar tazüokba kanga ajema lir aser Khristanpuri timtem balala ajuru. Senotsü meshitsü yong pua bener aoba tali kumogo, ta APPG report ajanga ashir.

Nigeria south tsütsü azüdokshi prokshia oa Lakurawa ta sür jihadist kiralongrar telok tasen ka northwest nung pokteta lir, shirnok ket nung nok-nü tajung lir aser radical Islamist agenda bena lir, ta WWL ajanga ashi.

Lakurawa ya expansionist Al-Qaeda insurgency Jama'a Nusrat ul-Islam wa al-Muslimin nung sendaktepa lir, koba Mali nungi adok.

Mexican putir ka Guerrero state nung tepset

Mexico City, Mongputeni/Oct. 09 (Agencies): Mexico south tsütsü azüdokshi agi sünger aliba state ka nung ano putir ka tepseter aliba ngutet, kong Catholic bishop tem tetsüngtai ia temesepba chiyongtsü shibelener tsüngta yimjung yanglua lir aser putir tepsetba ya memerenshi yutsür.

Father Bertoldo Pantaleón Estrada tasümang ya Mexico City south tsütsü mile 150 shi pilar Guerrero state kübok Mezcal municipality nung October 6 nü ngutet, ta Diocese of Chilpancingo-Chilapa ajanga ashi.

Father Pantaleón ya anogo ana jakdang samar liasü, ta par arogo ajanga ashi. Father Pantaleón dak tekong nung anaben akha, ta Mexican Milenio television ajanga ashi.

Father Pantaleón tepsetba nung pa indang driver dak temulung melemi lir, ta federal public security secretary Omar Garçka Harfuch-i October 7 nü ashi.

"Yimya ajak agi pa ya pa indang gari nung asüba ama sayur. Pa ya pa indang gari nung tepset. Pa Mass sentong ka nungi adeni aotsü liasü. Yimya ajak agi iba ya pa indang driver lir ta sayur," ta Garçka Harfuch-i osangbener dang ashi.

"Tang tashi father ya mapa tamajung inyakba nung dena aliba mejangjateter."

Father Pantaleón ya Mezcala nung aliba San

Cristóbal Parish nung pastor inyaka liasü, kong drug cartel inyaksangshi agi sünga lir, koba mapang ka Mexico indang 'heroin-producing heartland' ta züngshia liasü. 2014 küm police temi tesayur training agir nisung 43 tashi bus nungi anizüka mapa tamajung inyakba telok ka nem agütsür tepsetdaksüba asoshi iba region ya mapa tamajung inyakba nung nüngtugu akum. Iba lendong ya tanü tashi mebenteti lir.

"Azüdokshi mapa ajanga asen Catholic nungi ano maneni mangyim tia nung yutsüba ajanga jashir aser temulung shiranger. Anungji state aser federal ketdangsürtem dang tasü ita ochi nung bushisüngdanger iba mapa tamajung jangjaja aser aibelener nem tapet temerenshi agütsütsü akhanger," ta Mexican bishop's conference ajanga October 6 sangdong nung ashi.

"People of God indang pastor tem ama, nisung takum nem akhum agütsüba aser nübur ajunga atema tajung, ochi aser tesunep bushiba lokti nung azüdokshi yimya kecha malitsüla ta nisung ajak dang onoki nenshia ashir."

Guerrero state ya Mexico City south len lir aser yangji Acapulco aser tajemzükba jenjang nung aliba Indigenous nisungtem timtema alir, kong küm ter dak tema temesepba mozü amshir telok balala

tsüngta azüdokshi agi sünga lir.

Taoba mapang mapa tamajung inyakba telok temi heroin yanglua ayokba mapa raktepa inyaka liasü, saka fentanyl amshir tali akumba ajanga iba illegal business ya sama aser tangbo item mapa tamajung inyakba teloktem ya tashiyim amshia senotsü meshiba aser nisung apuba mapa inyaker, ta Bishop Salvador Rangel-i ashi.

Bishop Rangel ya 2014 aser 2022 tsüngta Diocese of Chilpancingo-Chilapa nung tekolak liasü aser par arogo aser Guerrero state sünepdaksütsü meranga meta talangi oa drug cartel "capos" mesüra mapa tamajung inyakba telok nung lenirtem den ajurutepa jembishinüa jajaba mechi aikati pa dak temulung melemi akum.

Guerrero indang bishops pezüi 2024 küm state indang drug cartels tsüngta yimjung yanglutsü meranga liasü, aser iba inyakyim ya iba mapang Mexico tir inyaka alisang Andrés Manuel López Obrador-ia pela agizüka liasü.

Father Pantaleón tepsetba ajanga Catholic putirtem asoshi Mexico ya alima nung tamajungtiba linük ka lir ta züngshiba tali jangjashir. 2006 sülen Mexico nung putir 53 tepsetogo aser 2019 aser 2024 tsüngta putir 10 tepsetogo, ta Catholic Multimedia Center ajanga ashi.

ANOGO ABEN TSÜNGREM DEN

Tejaokba ka - T. Ken 66:1-7

Tenüngsang ken 66 nung tejaokba kar lir item "arung" ta asüba nung sendaktepa lir. " arung aser ken tenang", "arung aser ajiang", "aser arung aser angang". Mezüng tejoakba anaji reprangdangdi.

Mezüngbuba nung tejaokbaji arung aser ken tenang. "Pa tenüng sentsüwangshi ken tenang"(t.2). Ken ken tenüng asangbaji talaktsü ka amai asenoki bilemer. Ken ken asenoki azümesen yimya nung Pa tushir. Saka ken züluri sentsüwangshia tushitsü ashir. Kechiba? " ne mapatem koda tetsübutsu, ta Tsüngrem dang shiang. Ne ain uluba ajanga ne tsükchirtemi peisasa ne dang azüzüktsü. Alima ajaki na külemtsü, aser ne dang ken atentsü"(t.3,4). Ibai missionary tejangraba ka lir. Asenoksasa asenok Kibuba asangtsüba masü. Asenok aru aser ken aten, aser alima ajak asenok den atentsü asenok jaoker.

Tanabuba tejaokbaji arung aser Tsüngrem mapa ajiang. Tanü meimchiri Tsüngrem mapatem dangji yimya ozüng mesüra scientific ozüng ta ajar. Asenoki rasaa ashitsü meranger, saka meshiteter. Arung aser Tsüngrem mapatem ajiang-kotak nung kechi ataloker, ne temang nung kechi ataloker aser otsü nung kechi ataloker. Ibai Tsüngrem mapa lir. " Pai pei tashi agi yimsü asür" (t.7). Satani iba lima yimya (system) nung yimsü masür- Tsüngrem lir. Pai satan dang langka kar inyaktsü melar, saka ibajia Pa sentsüwangshi asoshi amshir. Tsüngremi Pa tashi agi yimsü asür, aser Pai teti yimsü asütsü.

Nai tanü pelaa linera, arung aser ken tenang. Na ne ken samar lira, arung aser Tsüngrem mapatem ajiang. Talangka meli-i na ken tena alitsü.

Na tenüngsangken samaa lir asü? Arung aser Tsüngrem mapatem ajiang; iba yagi ne ken meyipa agütsütsü. Pa mapatem agi Pa uluba aser temeim jungkai adoktsür. Na Kibuba den jaja lira Kibuba tushiang aser tangar dang Pai ne taküm nung kechi inyak aji shiang.

Yimsü nung ajemdaker reshikang-shiba refugees kümzüktsüla: USCIRF

October 09, 2025: United States Commission on

Pakistan sorkari, Afghan refugee tem aikati kiralongra (USCIRF)-i, yimsü nung ajemdaker reshikangshi ajangshiba refugees kümzüktsü aser parnok temeden atema linük ajaki inyaksüla, ta metetdaksü.

Yaküm November ita nung Thailand-i, par linük nung refugees 86,000 shi lir ta metetdaksü, Thailand nung refugees ji teimbaka China nungi jena aruba Muslim Uyghur nungertem lir.

Uyghur refugees teimbakati Turkey nung jenoktsü meranger. Thailand nung refugees 300 shi apuba sülen Turkey-i yok aser 109 bo China-i tanaben meyipa yok.

USCIRF-i, "Alima tesem balala nung refugees teimba-teimba dang akümer, anungji parnoki timtem ano tuluba dang ajurutsü. Refugees tiembaka pei lima nung yimsü nung ajemdaker reshikangshiba maremei jenshiba refugees aika linük balala nung jenoka aliba

metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tipulima**

(n) asür tanela alidak, asüyim (land of souls of dead persons)

* Nisung ajak kenübo tipulimai aotsü.

Tir

(adj) neter tuku sülen züngdangba(eighty)

* Oboula arshi küm tir lir.



Tir Yimyim

OLONG PAITEP # 7295

	1				2	3			
4			5						6
						7			
	8								
	9			10			11		
						12			13
14									
						15			

TIPIEN

2. Sü jeplok
4. O agi merenshi
7. Ayongküm li
8. Chiyungtsü mapang süiadok
9. Tsüngrem den jembiba
12. Saklok
14. Samaba mebushitet
15. Mejanga onü
16. Tzü shiruru ka

- (4)
- (5)
- (5)
- (4)
- (9)
- (4)
- (5)
- (5)
- (4)

LANGTSÜNGLEN

1. ____ i
3. Kasa masü
5. Nüchi masü
6. Tashi endok
9. Langtem
10. Anü malidang
11. ____ kibur
13. Tebur tembar tsüngda jatepba

- (4)
- (6)
- (5)
- (5)
- (5)
- (6)
- (5)
- (4)

OLONG PAITEP # 7294 TELANGZÜBA**TIPIEN :**

1. Semtu, 3. Lepko, 5. Bilem,
8. Ulu, 10. Tsünpang,
11. Tesangwa, 13. Aoksa,
15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER

Australia tsür Alana King-i Women's ODI World Cup asayadang alima otsü tasen ka yangluogo. R. Premadasa Stadium, Colombo nung Pakistan den asayadang arishi küm 29 tain spinner King-i half-century (50 runs) yangluteta liasü aser ODI history nung tetsür kati mezüngbuba iba jenjang atongba ya la mezüngbuba lir.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangia zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.



1. Tenüng :
2. Tasoba anogo :
3. Küm : 4. Class :
5. School :
6. Talidak :
7. Salem osang :

BJP-i Assamese nunger den tsükchir yimogo: Rajen Gohain**Rajen Gohain****Guwahati, October 9, 2025**

(Agencies): Assam nung Bharatiya Janata Party (BJP) lennir tejen aser Nagaon nungi kümsük pezüben tashi Member of Parliament (MP) Rajen Gohain-i party toktsüogo.

2016 küm Prime Minister Narendra Modi'er mezüng cabinet nung Gohain-i Minister of State for Railways inyaka liasü. Iba mapang pai BJP state president ka ama inyak aser tanü state headquarters- Atal Bihari Vajpayee Bhawan nung

pai BJP toktsüba shidi agütsü.

"Lennirtemi party tenzükba tangatetba amadokba atema sasar. Ni mapang talangka aremzükogo aser temulung mesüi arur. Onoki iba party nung adenba ya nisung jak reprangtsü atema masü saka Atal Bihari Vajpayee aser LK Advani nung tangatetba nung noktaksü atema aden. Tang party ta tangar keti ogo" ta Gohain-i ashi.

Regional party kati dang Assam taginüba atema inyaktetsü aser Assam regional politics nung Bodoland People's Front (BPF) tanishir Hagrama Mohilary-i tongti shilem agitsü ta pai ashi.

"BJP ya Assamese nunger atema tsükchir tongtiba kümogo. Ni kü sasa bendanga agütsüba nisung masü mesüra tang BJP president Dilip Saikia ama rongsen mebendentetsü.

Chief Minister-i shinga ashi mangar aser pai mulungba ama dang inyaker" ta Gohain-isa ashi.

Rajen Gohain-i 1999 nungi 2014 tashi Nowgong (Nagaon) constituency nungi kümsük pezüben tashi inyakogo aser pai 1991 nungi BJP nung züngsem ka ama aru.

2023 nung Gohain-i Assam Food and Civil Supplies Corporation nung Chairman mapa nungi sodi agia liasü. Nagaon Lok Sabha constituency delimitation anema pai iba mera ka agi aser taruba upcoming elections nung iba constituency nungi BJP-i takok mengutetsüsa kümogo ta ashi.

Pai party toktsüba ajanga Assam BJP nung telemsa ka adokogo aser taruba assembly elections atema inyaktepdang tetsükdaksü ajurutsü.

2024-25 nung Mizoram-i tourist 139.5 teimbaaru: CMLalduhoma**Aizawl, October 9, 2025**

(Agencies): Tan financial year nung Mizoram tourism sector kanga renlokogo aser 2023-24 den medemdangra 2024-25 nung 139.5% renlok ta Chief Minister Lalduhoma-i ashi.

Mizoram ya tourist destination ka ama akümer aser iba wadang ajanga state rongsenketzüng nung teyari tulu agütsür ta Mizoram Travel Fest nung Lalduhoma-i ashi.

"Mizoram nung tourism kanga renloker. Taoba financial year dang nungi tourist 139.5% teimba aruogo ta official

statistics ajanga ashir. Taruba kümtem iba ya teimba küma aotsü" ta paisa ashi.

"Mizoram nung alirtemi India tesem balala nungi arurtem pelashishia agizüksüla aser welcoming destination naroküm mesamdaktsütsüla. Mizo nungeri tanga yariba, anepaluba, taintem akhüm tsübuba aser ochishiba tangatetbatem maneni alitsüla. Mizoram-i rongsenketzüng nung

ajangzükba dang masü saka linük jenjang nung tenüng tajung angutsü" ta CM Lalduhoma-isa metetdaksü.

Iba sentong nung State Tourism Department aser Environment, Forest & Climate Change Department tsüngda eco-tourism maparen külem ajungkettsü atema MoU ka nung sign sütep.

2024-25 küm Mizoram-i 5.24 lakh tourists aru aser 2023-24 nung 2.19 lakh arua liasü. Iba nungi domestic visitors 98.87% liasü.

Aizawl anasa Sairang tashi railway line tawa lapokba ajanga taküm tourist teimba arutsü imlar ta ketdangsürtemi ashi.

NPP president Conrad Sangma-i Imphal semdang**Imphal, October 9, 2025**

(Agencies): Meghalaya Chief Minister aser National People's Party (NPP) president Conrad Sangma-i anogo ananü atema Imphal semdangi arua lir.

Manipur nung tensa asadangtsü aser teti atema yimjung bener arutsü lenmangtem bushitsü atema pa aru.

Ni lisopur lennirtem den ajuruteptsü aser tensa angateta Manipur nung

yimjung bener arutsü atema asameyangtsü ta Imphal International Airport nung Conrad Sangma-i ashi.

"Iba ken o koktettsü atema mapa aika inyakogo. Kar takok nguogo saka tayongzükbatem lir. Yimjung arutsü atema mapa tulu inyaktsü nüngdaker. NPP-i Manipur state süngjemdaksütsü atema mapa inyaktsü" ta paisa ashi.

"Manipur nung NPP

renloka aotsüba nübor teyari dak dang aket. Onoki tangbo yimjung aser tensa süngjemtsü atema dang bilemer. Election tangbo magitsü saka onoki mezüng nübor tenzüksü dang bilemer" ta Conrad-isa shisem.

Conrad Sangma den NPP National General Secretary (Organisation) Paknga Bage, National Secretary Saidul Khan, aser National People's Youth Front president Nickey Nongkhaw nunger arua lir.

Israel aser Hamas tsüngta ceasefire tenzükogo

Jerusalem, Mongputeni/ Oct. 09 (Agencies): Israel aser Hamas tsüngta yimjung sentong asoshi mezüngbuba phase agizüktepogo, anungji Gaza nung rara tatem kati arutsü asoshi lenmang lapoktsür.

Iba sentong kübok Hamas-i par ket nung takum aliba hostages 20 chioktsü aser Israel-i mulungtepba tesem nungi par sepaitem anizüker aotsü aser Palestine nunger 2,000 jungnüa pua aliba chioktsü.

Iba osang ya alima nung lenirtem, Palestine nunger aser Israel nungeri pela agizükogo, saka osang tejangja kanga anünga lir aser Gaza ya shiri yimsü asüjar ano mejembi.

Mapang talangka nungi yongya ataba iba telemtetba ya ajanga küm ana ser anogo ana raraba nung teti asoshi yimjung alitsü teimla agütsür.

Israel Ato Kilonser Benjamin Netanyahu-i "Israel asoshi anogo tajung lir" ta ashi aser pai iba agreement agizüktsü asoshi par cabinet senden ka Brehostibarnü jazüktsü ta shiogo.

Cabinet nung agizükra,

ceasefire ya senden amenba sülen tenzüktsü, aser senden ya nikongdang 5:00 ako (par mapang) meta tenzüktsü.

Mezüng anogo pongu mapang Israel-i teyari oset bena aliba gari tulu 400 tashi anogoshia Gaza telungi yoktsü aser tesülen timba yoktsü, ta Palestine ketdangsür kati ashi.

Hamas-ia iba agreement nungya Gaza shilem kar nungi Israel nunger ainshitsü aser Palestinian territory telungi teyari osettem aitdaktsütsü dena lir ta shiogo. Parnoki US Tir Donald Trump dang Israel nem iba agreement shidak inyakdaktsütsü ayongzük.

White House nungi ketdangsür kati Israel sepaitem ainshiba ya ghonda 24-a magitsü amai lir ta ashi.

Aji tembangba sülen Hamas-i October 7, 2023 nü Israel amakdang pua bener aortem tang tashi Gaza nung alirtem ghonda 72 tsüngta chioktsü.

Pua alirtem ya Hombarnü tashinung chioktsü akok, ta Trump-i ashi.

Egypt nung tetsüngtai dangar ia anogo asem jembir mulungtepba ya Trump-i

September ita tatem 20-point peace plan benokba shilem mezüngbuba nungi timba lir.

Israel-i pua alirtem chiokba rongnung Marwan Barghouti madentsü, shiba Palestine nunger aikati tarutsü asoshi par tir ama repranger.

Tang tezüngzüktep agia aliba nungya Hamas-i nok-nü yutsütsü aser tarutsü nung Gaza yimsü asütsü indangbo maden.

Trump indang sentong nungbo international committee kati anir khen atema transitional government kati yimsü asütsü aser aji Trump aser taoba UK ato kilonser Tony Blair nati ketdang asütsü.

Iba osang sangdongba sülen alima tesem balala nung lenirtemi pela agizüker aser Israel nung aser Gaza nung nüburtem kanga benjongteper.

Hamas-i anir October 7, 2023 nü Israel south tsütsü amakdang nisung 1,200 tepseter ano nisung 251 pua bener ao. Kasa anogo nungi Israel-i Gaza amakba nung tanur 20,179 densema nisung 67,183 tepsetogo, ta Gaza nung Hamas meyong health ministry ajanga ashir.

Masood Azhar tenui JeM indang tetsür wing anitsü

Islamabad, Mongputeni/ October 9 (Agencies): Pakistan nung amendaker aliba kiralongrar telok Jaish-e-Mohammed (JeM)-i par telok indang mezüngbuba tetsür wing "Jamaat-ul-Mominaat" tenzükba sangdongogo.

Iba jenjang agiba ya JeM tekolakba aser UN-designated kiralongrar Maulana Masood Azhar tenüng nung shiti ka ajanga jangjaja liasü. Osang ajanga ashiba agi, unit tasenba atema recruitment ya October 8 nü Bahawalpur, Pakistan kübok Markaz Usman-o-Ali nung tenzükogo.

JeM indang propaganda outlet Al-Qalam Media-i lemsatepba shiti ajanga ashiba agi, Jamaat-ul-Mominaat ya iba telok indang tetsür brigade ama inyaksangshitsü.

WION sangdong ka ajanga ashiba agi, iba wing ya Masood Azhar tenu Sadiya Azhar lenisüba nung inyaksangshitsü. Sadiya kinungbo Yusuf Azhar ya May 7 nü Operation Sindoor mapang tepseta liasü. India nunger sepaitemi JeM indang Markaz Subhanallah base amakba mapang pa tepset.

Recruitment drives ya JeM commander kinungsütem aser Bahawalpur, Karachi, Muzaffarabad, Kotli, Haripur, aser Mansehra nung iba telok indang centre tem nung zünga aliba tetsürtem dak rangloker inyakdar.

Temetettsü kaji Operation Sindoor mapang India military-i southern Punjab kübok Bahawalpur nung JeM indang headquarter maka liasü. Iba

tesem amakba sülen JeM commander Ilyas Kashmiri-i taoba ita sayaba video ka ajanga ashiba agi, iba tesem amakba mapang Masood Azhar'er kinungertem aika tepsetogo.

Yimya agi JeM ya Deobandi nung tera yangloka aliba kiralongrar telok ka lir aser parnoki armed jihad mesüra rara nung tetsürtem nem shilem magidaktsür. Ajisüaka kiralongrartemi Pahalgam amakba aser Operation Sindoor sülen par telok yagi parnok policy melenshir ama reprangteter.

Itangitertemi ashiba agi, Masood Azhar aser pa adianu Talha al-Saif jointly nati JeM indang operational structure nung tetsürtem anioktsü temelaba agütsüogo aser iba

ajanga tetsür brigade tasen ka tenzüktsü asoshi lenmang lapoktsüogo.

Islamic State mesüra ISIS, Boko Haram, Hamas, aser LTTE amala kiralongrar teloktemi tetsür suicide bomber tem anisemba puti otsü ajanga sayuogo, saka JeM, Lashkar-e-Taiba (LeT), aser Hizbul Mujahideen (HM) nungeribo iba inyakyim sülen manidaki aruogo.

Osang balala ajanga ashiba agi, Operation Sindoor sülen, JeM, HM, aser LeT nunger densema kiralongrar teloktemi parnok tamendakdak Pakistan kübok Khyber Pakhtunkhwa (KPK) province-i belenerogo. Infrastructure tem raksar aliba yanglushitsü atema Pakistan nung amendaker aliba handler temi nüburtem dang nungi tenla meshia arudar.

László Krasznahorkai nem Nobel Prize in Literature agütsür

Stockholm, Mongputeni/ Oct. 09 (Agencies): Hungary nunger kaket zülur László Krasznahorkai, shibai teimla makaba temenünütsü novels zülur, pai nüburtem jangra azüngtsüsa aser mangdak tajung yur kaket züluba asoshi Brehostibarnü Nobel Prize in Literature takok nguogo.

Pai mezüng züluba "Satantango" aser "The Melancholy of Resistance" kaket tem Hungarian director Béla Tarr-i film yanglua liasü.

Nobel tendanger temi pa indang "artistic gaze" tenüng asang, kong tiazü kecha mali aser ibaji ajanga social order tashi mait aser pa art tashi nung tamang akang akanga aliba

angur, ta Nobel committee indang Steve Sem-Sandberg-i sangdong nung ashi.

"László Krasznahorkai ya Central European yimya nung kaket zülur tajung ka lir, koba (Franz) Kafka nungi Thomas Bernhard tashi aor aser yimya khenyongi balaka lir," ta Nobel tendanger temi ashi. Arishi küm 71 tai Krasznahorkai den osang magitepteter aser paia iba sangdong indang jembia mali.

Pai 2015 Man Booker International Prize densema sempet aika ngua lir. Pai ano 2019 küm US nung "Baron Wenckheim's Homecoming" atema National Book Award for Translated Literature ngua liasü. America nunger kaket zülur

OFFICE OF THE CHUNGZIA VILLAGE COUNCIL MOKOKCHUNG NAGALAND	
TEPELALEMSATEPER	
Ozü Chungtia yimkong nung Anentsü lendong tulu ataloka nüburtem kiojen raksaja okrongtepba osang angashia akang tembar yim Tzükong 6 prokshia alirtem Yimden aser Arogotem, Aor tokolak tentet nungi tenzüker lokti balala, kija kibongtem shirnokisa lenla balala nung özü yimkong den ariabilem temeim mapa sayua sarasadem den ali rongsen agi yaritepogo Chungtia Village Council tenüng nung ajak dang pelaba lemsateper.	
Asen takoksang Tsüngremi nenok ajak len ania moajangma.	
1. Ao Senden	- Rs. 20,000/-
2. Ongpangkong Mungdang	- Rs. 10,000/-
3. Watsu Mungdang	- Rs. 20,000/-
4. Ongpangkong Tetsur Mungdang	- Rs. 5000/-
5. Ao Kaketshir Telongjem	- Rs. 50,000/-
6. Ongpangkong Students' Conference	- Rs. 10,000/-
7. Nokpu Village Council	- Rs. 50,000/-
8. Nokpu Senso Union Mokokchung Town	- Rs. 5000/-
9. Kupza Village Council	- Rs. 10.000/-
10. Longsa Village Council	- Rs. 10,000/-
11. Kohima Aliba Senso Telongjem.	- Rs. 50,000/-
12. Chuchuyimlang Village Council.	- Rs. 50,000/-
13. Aliba Village Council	- Rs. 50,000/-
14. Warumong Village Council	- Rs. 50,000/-
15. Mokokchung Town Longsa Senso Telongjem	- Rs. 5000/-
16. Khar Putu Menden	- Rs. 30,000/-
17. Lakhuni Village Coumcil	- Rs. 20,000/-
18. Khensa Village Council	- Rs. 20,000/-
19. Kinunger Village Council	- Rs. 10,000/-
20. Mangmetong Village Council	- Rs. 30,000/-
21. Mokokchung Town Aor Officer Telongjem	- Rs. 30,000/-
22. Govt Primary School Longjongkong	- Rs. 5000/-
23. Yimyu Ward Council Mokokchung Town	- Rs. 10,000/-
24. Kohima Chungtia Senso Telongjem	- Rs.1,00,000/-
25. Molungyimsen Village Council	- Rs.1,00,000/-
26. Longjemdang Village Council	- Rs. 20,000/-
27. Aliba Senso Telongjem Mokokchung Town	- Rs. 20,000/-
28. Chuchuyimpang Village Council	- Rs. 20,000/-
29. Chuchuyimpang Union Mkg Town	- Rs. 10,000/-
30. Salulamang Village Council	- Rs. 20,000/-
31. Longmisa Village Council	- Rs. 10,000/-
32. Chumoukidema Chungtia Senso Telongjem	- Rs. 50,000/-
33. Kijongsangba Mayanger Longkumer Semchir	- Rs. 50.000/-
34. Unger Kosasanger Putu Menden	- Rs. 20,000/-
35. Molungkimong Village Council	- Rs. 30,000/-
36. Changtongya Kosasanger Putu Menden	- Rs. 30,000/-
37. Satsu Village Council	- Rs. 10,000/-
38. BDO Ongpangkong Block	- Rs. 50,000/-
39. Sungratsu Village Council	- Rs. 20,000/-
40. Ungma Village Council	- Rs. 50,000/-
41. Indian Red Cross Society Mokokchung	- Rs. 10,000/-
42. Longjakrep Semchir Kichu Mungdang	- Rs. 10,000/-
43. Chungtia Senso Telongjem Mokokchung Town	- Rs. 20,000/-
44. Changki Ayim Asem Putu Menden	- Rs. 20,000/-
45. Mekuli Village Council	- Rs. 10,000/-
46. BJP Mokokchung Unit	- Rs. 20,000/-
47. Mokokchung Village Council	- Rs. 20,000/-
48. Khensa Student Union	- Rs. 10,000/-
49. Dimapur Chungtia Senso Telongjem	- Rs. 50,000/-
50. Smt.Imyapangla PD DRDA	- Rs. 50,000/-
51. Chungtia Fellowship Mokokchung Town	- Rs. 50,000/-
52. Mopungchuket Putu Menden	- Rs. 50,000/-
53. Aliba Union Dimapur	- Rs. 20,000/-
54. Chumoukidema Ongpangkong Senso Telongjem	- Rs.5000/-
55. Chungliyiimsen Village Council	- Rs. 5000/-
56. Longjongkong Excutive Committee	- Rs. 10,000/-
57. Grayo Club Chungtia	- Rs. 20,000/-
58. Japu Village Council	- Rs. 10,000/-
59. Mr. Takachiba Advocate Kohima	- Rs. 2000/-
60. Chungtiayimsen Village Council	- Rs. 50,000/-
61. Chungtiatsür Telongjem Mokokchung Town town	-Rs.30,000/-
Sd/- Assamwati Council Chairman	Sd/- Toshi Kichu Council Secretary

Susan Sontag-ia Krasznahorkai ya "contemporary master of the Apocalypse" ta ashir. Pa ya America nunger sangro aser kaket zülur Allen Ginsberg den medemer lir aser New York City semdangba mapang teti Ginsberg den anener.

2022 küm Imre Kertesz sülenbo pa ya Hungary nunger mezüngbuba alitsü. Nobel Prize in Literature ya taoba mapang Ernest Hemingway, Toni Morrison aser Kazuo Ishiguro nunger temi ngua lir.

Literature prize ya Nobel committee of the Swedish Academy ajanga 117 ben nisung 121 nem agüja lir. Taoba küm iba sempet ya South Korea nunger kaket zülur Han Kang-i angu.

Tan hopta sangdongba nung literature prize ya pezü buba alitsü. Medicine, physics aser chemistry indang 2025 Nobels bo agütsüogo. Nobel Peace Prize takok angur ya Hokulbarnü sangdongtsü. Nobel tatembangba Nobel Memorial Prize in Economic Sciences ya Hombarnü sangdongtsü.

Nobel Prize award sentong ya Alfred Nobel asüba anogo December 10 nung agütsür. Nobel ya Swedish nunger industrialist takar ka liasü aser dynamite ya pai bushitet.

Sempet shia sen 11 million Swedish kronor (\$1.2 million jungnüa) lir aser takok angur temi 18-carat gold medal aser diploma ka agütsütsü.

NSF Trophy: Kuki United aser Anal Lenruwl Tangpi nati asaya akok



Kohima, Mongputeni/October 9 (TYO): Indira Gandhi Stadium Kohima nung tang asaya aliba NSF Martyrs' Memorial Trophy nung Brehostibarnü Manipur nungi Kuki United aser Anal Lenruwl Tangpi nati pei tata asaya koka quarter final-i iogo.

Pre-quarter final asaya tenetbuba asayaba mapang Kuki United-i, direct seeded team - Delhi Police goal 2-0 agi koka liasü. Delhi Police ya iba asayamung atema jaokba team asüba agi pre-quarter finals nungi asayatsü maongka agüja liasü.

Asaya nung Kuki United

atema Lunaldo Kuki-i (77) minute 23 aser 48buba nung goal ana idakja parnoki asaya akok.

Iba asaya atema Lunaldo nemsang Angami Sports Association Vice president Neisavotuo Whuorie-i player of the match naroküm agütsü, aser kasa mapang nung OSD Finance, Nagaland Ketoulhou Metha match patron liasü.

Tanü pre-quarter final asaya tatembangbuba nung Anal Lenruwl Tangpi-i taoba mapang iba asayamung koker aliba Nagaland police team goal 3-0 agi kokogo.

Kagaly-i Anal Lenruwl Tangpi atema mezüngbuba goal

asaya mezüngbuba shilem nung mapang apuloktsür asayaba mapang idaktsü. Iba sülen asaya tanabuba shilem nung Winkle-i minute 61buba nung tanabuba goal idaktsü aser Changkingam-i tasembuba goal idakja parnoki asaya ayong ayonga akok.

Kohima Municipal Council Councillor, Vimhalie Pienyü-i player of the match naroküm Anal Lenruwl Tangpi nungi aser Winkle nem agüja liasü.

Mezüngbuba QF asaya:

October 10 @ 4:30

Chedema Village Youth Organisation vs Tangkhul Katamnao Saklong Manipur.

Indian Jr Team-i otsü tasen ka yangluogo

Mongputeni/October 9, 2025 (Agencies): National Centre of Excellence nung Brehostibarnü BWF World Junior Mixed Team Championships nung India junior team-i Korea koka semifinal tongtetogo.

Team ana tsüingda quarter final asaya ya ghonda asem shi asayaba sülen India-i 44-45, 45-30, 45-33 agi asaya kokogo, aser parnok semifinal nung Asian U-19 Mixed Team champions Indonesia den asayatsü shirnoki Chinese Taipei 45-35, 45-35 agi kokogo.

India team semi-final atongba tetezü tang mezüngbuba India team-i BWF World Junior Championships nung medal ka angutsü jangjaogo, koba otsü tasen ka asütsü.

Quarterfinals nung India team ya kija asayartem dak metaloker liasü aser kasa mapang nung Korea team-i tarep asaya nung takok tajungba nguteta liasü.

Mezüngbuba set nung

Bhargav Ram Arigela aser Viswa Tej Gobburu nati 5-9 agi Cho Hyeong Woo aser Lee Hyeong Woo na makok. Tetsür tarep asaya nung Vennala K aser Reshika U nati Cheon Hye In aser Moon In Seo na 10-9 agi akok aser iba sülen Rounak Chouhan-i ano Choi Ah Seung 11-9 agi koka liasü.

Ajisüaka tarep temeyoktep asaya nung C Lalramsanga aser Aanya Bisht nati Lee aser Cheon na 4-9 agi makok, koba tetezü Unnati Hooda-i la indang opponent Kim Han Bi point teku matong tsüingda point 15 angutsü nüngdaka aküm. Unnati-i tashi ita tenzüker aser 3-0 agi tejakdang aküm, saka Kim-i kanga junga asaya 6-6 aküm aser Hooda-i asaya makoktsü ama bilema liasü.

Ajisüaka Unnati-i kanga junga asaya point pongu atonga angu aser point 44-44 aküm. Ajisüaka set point nung service aoba mapang shuttle net nung tsükdaka India team-i asaya tera agi makok.

Tanabuba set nung India-i asayar ana melen. Lalramsanga-i Gobburu melen aser Vishakha Toppo-i Bisht melena liasü.

Lalramsanga aser Bhargav nati 9-7 agi Cho aser Lee na koka tenzüker aser Vennala aser Reshika natia asaya koka parnok point trok agi timba aküm. Iba sülen Unnati asayatsü mapang tashi nungbo India team point teku agi tejakdang liasü.

Tasembuba set nunga Lalramsanga aser Bhargav nati 9-4 agi asaya koka tenzüker, saka Vennala aser Reshika nati Cheon aser Moon na mekoki Korea team point ana agi tejakdang aküm.

Iba sülen Chouhan-i 11-4 agi Choi koka India team point pongu agi tejakdang aküm. Lalramsanga aser Bisht nati ano 9-4 agi asaya koka parnok point tenet agi timba aküm aser Unnati-i 9-4 agi asaya koka parnoki tasembuba set koka liasü.



Kumlong Ward-i 4 buba Mokokchung Town Inter-ward volleyball asayamung koker tetushi tesemdanger Er. Chutsusie Thowachu, E.E Electrical division, Mokokchung ket nungi senpet agizüker külen telok külemi tangokba noksa nung angur. Iba asayamung ya October 8th & 9th anogo ananü Multi-Purpose Sports Complex, Mokokchung nung asaya-a liasü. Nija senpet Best Spiker - Imtirenba (Kumlong), Best Setter - Aongsen (Kumlong), aser Player of the Tournament - Bendangmeren (Mongsenbai) parnoki agizük. Final match nung Kumlong ward-i 25/20, 19/25, 25/20, 23/25, 17/15 agi Mongsenbai madak takok tulu angu.

ICC Player of the Month atema Indian nunger asayar 3 nominate süogo

Mongputeni/October 9, 2025 (Agencies): India nunger tebur cricket asayar Abhishek Sharma aser Kuldeep Yadav na aser tetsür asayar Smriti Mandhana nunger September ita atema 'ICC Player of the Month' awards asoshi nominate süogo.

Left-handed T20 specialist Abhishek-i, UAE nung Asia Cup nung kanga junga asaya-a team takok dangi ani, aser iba asayamung nung pai T20I asaya tenet nung run 314 yanglua 'Player of the Tournament' naroküm agizüka liasü.

Arishi küm 25 tain asayar yagi rating point 931 nguogo, koba tebur T20I asaya puti otsü nung asayar kati rating point timtiba tongtetba asütsü.

Wrist spinner Kuldeep-ia Asia Cup nung kanga junga asayaago. Pai iba asayamung nung wicket 17 agia ajak dang wicket timtiba agi aser pa indang economy rate 6.27 liasü.

Asia Cup nung mezüngbuba asaya UAE den asayaba

mapang pai run 7 agütsür wicket 4 agi aser tatembangbuba asaya Pakistan den asayaba mapang run 30 agütsür wicket 4 agia liasü.

Zimbabwe nunger asayar Brian Bennett-a iba naroküm atema nominate süogo. Pai, T20I teku nung run 497 yanglu. Pa indang average 55.22 aser strike rate 165.66 liasü.

Tetsürtem rongnung top-order batter Mandhana, shibai Australia den ODI asayamung nung 'Player of the Series' naroküm ngua liasü, la tetsürtem rongnung 'ICC Player of the Month' atema nominate süogo. Lai September ita ODI asaya pezü nung run 308 yanglu. La indang average 77 aser strike rate 135.69 liasü. Australia den asayaba mapang lai run 58, 117 aser 125 yanglua liasü.

Pakistan opener Sidra Amin aser South Africa tsür Tazmin Brits nata September ita atema iba naroküm asoshi nominate süogo.

Küm 11 sülen Mitchell Starc BBL asayatsü



League akokba tang tashi menungra bilemteter. Kü nükjidingji ano club atema takok marok ka koktsütsü asoshi lir," ta pai ashi.

Starc ya mezüngbuba BBL asayaba küm Sixers nungi asaya aser iba mapang pa asaya trok nung asaya aser final nung Perth Scorchers pur akokba asaya nung pai teyari tulu agüja liasü. Maneni 2012 küm Sixers' puri Champions League akokba mapang pa wicket timtiba agiba asayar liasü.

Pa ya BBL indang supplementary player system küboki aiter, koba ajanga team tem nem Cricket Australia-i contract agütsür aliba asayar enoksemtü atema temelaba agütsür. Item asayartem yagi asayar 18 agi kümtetba squad nung primary spot magir. BBL team shia nem iba amala supplementary position anana agütsür.

Sydney Sixers' general manager Rachael Haynes-i, taruba season atema Starc anisemba asoshi kanga pelaba lemsatepogo. "Mitch-i ball tasen aser tejen naprongla kanga junga ontetba ya tanga kecha den medemdangtsü mali, aser pai onok final tonga asayatsü asoshi tongtibang shilem agitsü imlar," ta Haynes-i ashi.

"Kümtem tsüingda masayaka Mitch ya club indang ambassador ka liasü aser BBL|15 nung pai tongtibang shilem agitsü yongya atar," ta Haynes-isa shisem.

Mongputeni/October 9, 2025 (Agencies): Australia nunger fast bowler Mitchell Starc küm 11 sülen Big Bash League nung 2025-26 season nung Sydney Sixers nungi asayatsü renema lir. Iba asayamung ya December 14 nungi January 25 tashi asayatsü.

Starc ya supplementary asayar ama aniokogo aser pa January 8 nü Ashes tembangba sülenang asayatsü, ajia anema ali nung dang asayatsü.

Asayar tejen ya T20I asaya nungibo anenatokogo, saka tang BBL nung asayatsü telemtetba agiogo. Pa T20I asaya nungi anenba ajanga iba asayamung nung asayatsü atema lenman lapoktsüogo. Starc taoba mapang 2014 season nung Sixers nungi asayaago aser iba mapang pai asaya 10 nung wicket 20 agia liasü.

"Ni BBL|15 nung Sixers pur tola semer asayatsü matateter," ta Starc-i ashi. "Taoba küm ter tsüingda ni club den sendaktepa aruogo aser ni taküm lemluwa asayatsü yongya atar. Ni Sixers den kanga junga sendaktepa lir aser BBL|01 aser Champions

BILEMDANGANG

"Ayong tarokji kodanga tetsüng anapronglai masadanger."